

南無本師釋迦牟尼佛



如量壽量品第十五

爾時佛告諸菩薩及一切大眾。諸善男子。汝等當信解如來誠諦之語。復告大眾。汝等當信解如來誠諦之語。又復告諸大眾。汝等當信解如來誠諦之語。是時菩薩大眾。彌勒為首。合掌白佛言。世尊。惟願說之。我等當信受佛語。如是三白已。復言。惟願說之。我等當信受佛語。爾時世尊。知諸菩薩慇懃四請不止。而告之言。汝等諦聽。如來秘密神通之力。汝等一切世間天人及阿修羅。皆謂我今。出釋氏宮。去伽耶城不遠。坐於道場。得阿耨多羅三藐三菩提。然。善男子。我實成佛已來。無量無邊百千萬億那由他劫。假使有人以五百千萬億那由他阿僧祇三千大千世界。磨為微塵。過於東方五百千萬億那由他阿僧祇國。乃下一塵。如是東行。盡是微塵。諸善男子。於意云何。是諸世界。可得思惟校計。知其數不。彌勒菩薩等俱白佛言。世尊。是諸世界。無量無邊。非算數所知。亦非心力所及。一切聲聞辟支佛。以無漏智。不能思惟知其限數。我等住阿惟越致地。於是事中亦所不達。世尊。如是諸世界。無量無邊。爾時佛告大菩薩眾。

諸善男子。今當分明宣語汝等。是諸世界。若著微塵及不著者。盡磨為塵。一塵一劫。我成佛已來。所經劫數復過此塵百千萬億那由他阿僧祇劫。自從是來。我常在此娑婆世界。說法教化。是地涌菩薩。則是初成佛教化成就。亦於餘處百千萬億那由他阿僧祇國。導利衆生。諸善男子。於是中間。我說然燈。大通智勝佛等。又復言其入於涅槃。如是皆以方便分別。諸善男子。若有衆生來至我所。我以佛眼。觀其信等諸根利鈍。隨所應度。而為說法。處處自說名字不同。年紀大小。國土各異。亦復現言當入涅槃。又以種種方便說微妙法。能令衆生發歡喜心。諸善男子。如來見諸衆生。樂於小法。德薄垢重者。為是人說。我少出家。得阿耨多羅三藐三菩提極速。然我實成佛已來。久遠若斯。但以方便教化衆生令入佛道。作如是說。諸善男子。如來所演經典。皆為度脫衆生。或說己身。或說他身。或示己身。或示他身。或示己事。或示他事。諸所言說。皆實不虛。是我秘密神通所作。所以者何。如來如實知見三界之相。無有生死。若退若出。亦無在世及滅度者。非實非虛。非如非異。不如三界見

於三界。如斯之事。如來明見無有錯謬。以諸衆生有種種性。種種欲。種種行。種種憶想分別故。欲令生諸善根。以若干因緣譬喻言辭。種種方便說法。所作佛事。未曾暫廢。如是我成佛已來。甚大久遠。壽命無量世界微塵數劫。常住不滅。諸善男子。我本行菩薩道。所成壽命。今猶未盡。復倍上數。然今非實滅度。而便唱言當取滅度。如來以是方便。教化衆生。所以者何。若佛久住於世。薄德之人。不種善根。貧窮下賤。貪著五欲。入於憶想妄見網中。若見如來常在不滅。便起憍恣。而懷厭怠。不能生難遭之想。恭敬之心。是故如來。以方便說。比丘當知。諸佛出世。難可值遇。所以者何。諸薄德人。過無量百千萬億劫。或有見佛。不作福德。或不見者。以此事故。我作是言。諸比丘。如來難可得見。斯衆生等。聞如是語。必當生於難遭之想。心懷戀慕。渴仰於佛。便種善根。是故如來雖不實滅。而言滅度。又善男子。諸佛如來。法皆如是。為度衆生。皆實不虛。譬如良醫。智慧聰達。明練方藥。善治衆病。其人多諸子息。若二十。乃至百數。以有事緣。遠至餘國。諸子於

後。飲他毒藥。藥發悶亂。宛轉於地。是時其父。還來歸家。諸子飲毒。或失本心。或不失者。遙見其父。皆大歡喜。拜跪問訊。善安隱歸。我等愚癡。誤服毒藥。願見求療。更賜壽命。父見子等苦惱如是。依諸經方。求好藥草。色香美味。皆悉具足。搗篩和合。與子令服。而作是言。此好良藥。色香美味。皆悉具足。汝等可服。速除苦惱。無復衆患。其諸子中。不失心者。見此良藥。色香俱好。即便服之。毒盡除愈。餘失心者。見其父來。雖亦歡喜問訊。求索治病。然與其藥。而不肯服。所以者何。毒氣深入。失本心故。於此好色香藥。而謂不美。父作是念。此子可愍。為毒所中。心皆顛倒。雖見我喜。求索救療。如是好藥。而不肯服。我今當設方便。令服此藥。即作是言。汝等當知。我今衰老。死時已至。是好良藥。今留在此。汝可取服。勿憂不差。作是教已。復至他國。不久遣使還告。汝父已死。是時中毒諸子聞父背喪。心大憂惱。而作是念。若父在者。慈愍我等。能見救護。今者捨我。遠喪他國。自惟孤露。無復恃怙。常懷悲感。心遂醒悟。乃知此藥。色香美味。即取服

之。毒病皆愈。其父聞子悉已得差。尋便來歸。咸使見之。諸善男子。於意云何。頗有人能說此良醫虛妄罪不。不也。世尊。佛言。我亦如是。成佛已來。無量無邊百千萬億那由他阿僧祇劫。為衆生故。以方便力。言當滅度。亦無有能如法說我虛妄過者。

自我得佛來	所經諸劫數	無量百千萬	億載阿僧祇
常說法教化	無數億衆生	令入於佛道	爾來無量劫
為度衆生故	方便現涅槃	而實不滅度	常住此說法
我常住於此	以諸神通力	令顛倒衆生	雖近而不見
衆見我滅度	廣供養舍利	咸皆懷戀慕	而生渴仰心
衆生既信伏	質直意柔輒	一心欲見佛	不自惜身命
時我及衆僧	俱出靈鷲山	我時語衆生	常在此不滅
以方便力故	現有滅不滅	餘國有衆生	恭敬信樂者
我復於彼中	為說無上法	汝等不聞此	但謂我滅度
我見諸衆生	沒在於苦惱	故不為現身	令其生渴仰
因其心戀慕	乃出為說法	神通力如是	於阿僧祇劫
常在靈鷲山	及餘諸住處	衆生見劫盡	大火所燒時

我此土安隱	天人常充滿	園林諸堂閣	種種寶莊嚴
寶樹多華果	衆生所遊樂	諸天擊天鼓	常作衆伎樂
雨曼陀羅華	散佛及大衆	我淨土不毀	而衆見燒盡
憂怖諸苦惱	如是悉充滿	是諸罪衆生	以惡業因緣
過阿僧祇劫	不聞三寶名	諸有修功德	柔和質直者
則皆見我身	在此而說法	或時為此衆	說佛壽無量
久乃見佛者	為說佛難值	我智力如是	慧光照無量
壽命無數劫	久修業所得	汝等有智者	勿於此生疑
若有生疑者	當斷令永盡	佛語實不虛	信則福德增
如醫善方便	為治狂子故	實在而言死	無能說虛妄
我乃為世師	救諸苦患者	為凡夫顛倒	實在而言滅
以常見我故	而生憍恣心	放逸著五欲	墮於惡道中
我常知衆生	行道不行道	隨所應可度	為說種種法
每自作是意	以何令衆生	得入無上慧	速成就佛身